

HE WHAKAMĀRAMA MŌ TE NCEA

NZQA

NEW ZEALAND QUALIFICATIONS AUTHORITY
MANA TOHU MĀTAURANGA O AOTEAROA

QUALIFY FOR THE FUTURE WORLD
KIA NOHO TAKATŪ KI TŌ ĀMUA AO!



MĀORI

Rārangi Ūpoko

NCEA – ngā kupu whakamārama	1
Te tutuki NCEA	3
Te Aromatawai	7
Ngā Tohu Taunaki	9
Te whakauru Whare Wānanga (UE)	10
Te Hiranga – Ngā Karahipi o Aotearoa	11
Ngā Huarahi Mahi	12
Ngā Rauemi Tautoko	13



Taku Nama Ākonga Ā-Motu:

Kei tō kura tō nama ākonga ā-motu.

Whakamahia tēnei nama kia rēhitatia ki te paetukutuku o NZQA hei tiro atu ki ō whiwhinga me ō tohu mātauranga.

Rehitatia mai ki te hononga paetuku nei:
www.nzqa.govt.nz, ā, pēhia te pātene 'Login'
hei te kokonga katau o runga.

NCEA – ngā kupu whakamārama

Ko te NCEA he tohu mātauranga ā-motu. Koia hoki te tohu mātauranga matua mō ngā ākonga katoa kei ngā kura tuarua. E toru ōna kaupae – 1, 2 me te 3 kei te Taura Here Tohu Mātauranga o Aotearoa (NZQF).

Ko ngā akoranga katoa o te New Zealand Curriculum me Te Marautanga Māori o Aotearoa e whai wāhi ana ki te NCEA me te tohu Whakauru Whare Wānanga (UE).

Ko te NCEA mō te katoa – tērā pea e aro ana ki ngā mahi rehe, ki te Whare Wānanga, ki te whakapakari pūkenga rānei i te wehenga atu i te kura.

Q

Te Mana Tohu Mātauranga O Aotearoa (NZQA):

- Ka whakarite i ngā tohu mātauranga i te Taura Here Tohu Mātauranga o Aotearoa
- Ka whakahaerehia te NCEA
- Ka whakaū kounga hoki i ngā wānanga me ngā whare ako
- Ka whakatau i ngā tohu mātauranga me ētahi o ngā paerewa.



Te maherehere i āu mahi ako

Ko ngā marau katoa ka ako koe i te kura ka whai pānga ki āu mahi i te mutunga o te kura. Nō reira, kia whānui ai te kōwhiri o ngā tūranga mahi, me whai whakaaro ki te ako i ēnei marau: Pūtaiao, Hangarau, Pūkaha, Pāngarau (STEM), te reo Ingarihi me te reo Māori.

He whānui tonu te kōwhiringa o ngā marau me ngā kōhi mō te NCEA engari ka rerekē ki tēnā kura, ki tēnā kura.

Mēnā e āwangawanga ana koe mō ngā kōhi e tika ana kia whai atu, me kōrero ki ō kaiako, ki ō ūpoko rānei i te kura. Mā rātou anō ngā pātai mō te NCEA e whakautu, ā, ka tautoko hoki rātou i tō maherehere ako kia tutuki pai ai āu whāinga katoa.

Te tutuki NCEA

Ngā Kaupae

Ko te NCEA Kaupae 1 te tūāpapa o ngā mōhiotanga me ngā pūkenga.

Ko te NCEA Kaupae 2 te tohu mātauranga **mōkito** kia whai tūranga mahi, kia whai rānei i ētahi atu hōtaka kei ngā wānanga, kei ngā whare wānanga.

Ko te NCEA Kaupae 3 me te tohu whakauru whare wānanga te tohu matua kia āhei ai te uru atu ki te nuinga o ngā whare wānanga me ōna hōtaka ako.

Ko te nuinga o ngā ākonga tau 11 ka tīmata ki te whai i te NCEA Kaupae 1, kātahi ka mahia te Kaupae 2 kei te tau 12, ā, ko te Kaupae 3 kei te tau 13. E taea ai te whakawhenumi Kaupae e ai ki tō ake hōtaka ako. Hei tauira, ko ngā ākonga tau 12 ka whai i te nuinga o ngā paerewa kei te Kaupae 2, engari ka tīmata pea i tētahi kōhi hou kei te Kaupae 1, kei te Kaupae 3 rānei i runga anō i tō rātou mātanga.

E taea ai e koe te whai i te NCEA Kaupae 2 i mua i tō whiwhinga i te Kaupae 1.



Mātakihia mai te kiriata e whakamārama ana i te NCEA ki te paetukutuku matua nei:

www.nzqa.govt.nz/ncea/understanding-ncea/how-ncea-works/video/



Ngā whiwhinga me ngā paerewa paetae

Me 80 ngā whiwhinga kia tutuki pai ai te NCEA kei ia o ngā Kaupae 1, 2, 3. Mā te aromatawai hoki i ngā paerewa paetae ka riro i a koe ngā whiwhinga. Ko tā te paerewa paetae, he aromatawai i te whānui o ngā mōhiotanga me ngā pūkenga nō roto mai i tētahi marau. Hei taurira, ko te paearu pea o tētahi paerewa paetae he arohaehae tuhinga, he whakataki whaikōrero, he whakawhanake mahere pākihi rānei. Ko ētahi o ngā paerewa paetae e hāngai tonu ana ki te Mātauranga Māori. Heoi anō, kei ngā kura anō te tikanga o ngā kōhi me ōna paerewa paetae ka whārikihia nei ki ngā ākonga.

Ka riro i a koe ngā whiwhinga mā te whakaatu i tō mōhio, i tō mahi rānei e ai ki taua paerewa. Hei taurira, ko te paerewa paetae kei te Kaupae 1 'Te whakahāngai tūāhua taurangi hei whakaoti rapanga' e 4 ngā whiwhinga ka riro i a koe mēnā ka tutuki i a koe ngā mahi aromatawai me ngā pūkenga hoki o taua paerewa paetae.

Ka taea hoki te whai whiwhinga i ngā mahi o waho i te akomanga. Arā ko te whai reihana hautū waka, te whakaoti mahi, te whakaoti hōtaka rangahau, te ako rānei ki tētahi whare ohu mahi. Ko ngā mahi katoa ka whai whiwhinga.

1

Kia tutuki pai ai te NCEA Kaupae 1 me whakaoti i a koe te:

- 60 whiwhinga kei te Kaupae 1 piki ake rānei
- 10 whiwhinga mō te reo matatini
- 10 whiwhinga mō ngā tohu tau.

2

Kia tutuki pai ai te NCEA Kaupae 2 me whakaoti i a koe:

- 60 whiwhinga kei te Kaupae 2 piki ake rānei
- 20 whiwhinga i kaupae kē atu
- Kua tutuki hoki ngā whiwhinga mō te reo matatini me ngā tohu tau.

3

Kia tutuki pai ai te NCEA Kaupae 3 me whakaoti i a koe:


- 60 whiwhinga kei te Kaupae 3 piki ake rānei
- 20 whiwhinga i kaupae kē atu
- Kua tutuki hoki ngā whiwhinga mō te reo matatini me ngā tohu tau.

Kei tō kura anō ngā kōhi hei whakatutuki i te NCEA Kaupae 1, 2, me te 3



NGĀ KŌHI

Kei ia kōhi he kāhui paerewa, he kāhui paerewa paetae rānei



NGĀ PAEREWA



He tau whiwhinga kei ia o ngā paerewa



NGĀ WHIWHINGA

Ka āpiti atu ngā **whiwhinga** katoa ki te **NCEA Kaupae 1, 2, me te 3**

Me mau hoki i a koe ngā whiwhinga mō te Reo Matatini me Ngā Tohu Tau **kia tutuki pai ai te Kaupae 2 me te 3**



Ngā whiwhinga mō te Reo Matatini me Ngā Tohu Tau

Me mātua mau i a koe ngā whiwhinga mō te Reo Matatini (arā ngā pūkenga pānui, tuhituhi, kōrero, whakarongo) me ngā whiwhinga mō Ngā Tohu Tau (arā ngā pūkenga pāngarau, tau, ine, tauranga) kia tutuki pai ai ngā Kaupae e toru o te NCEA. Kia mōhio mai, kotahi noa te wā kia whai i ngā whiwhinga nei, ā, ka ea i a koe ngā herenga o te Reo Matatini me Ngā Tohu Tau mō ngā kaupae katoa 1, 2 me te 3 mō te NCEA.

He nui ngā paerewa hei whakaatu i ō pūkenga reo matatini me ngā tohu tau. Ka taea te whakatutuki mā roto mai i ngā kōhi huhua, i ngā paerewa paetae, i ngā paerewa motuhake rānei. Mēnā e matawaenga ana koe e ai ki ō paerewa mō te reo matatini me ngā tohu tau, kōrerohia ki ngā kaiako i tō kura.



Te Aromatawai

Ka arotakengia ngā mahi katoa o te NCEA mā te mahi aromatawai ā-roto me te mahi aromatawai ā-waho.

Ko te aromatawai ā-roto ka whakamahia i roto i te tau, ā, ka aromatawaingia āu mahi katoa e ngā kaiako i tō kura.

Ko te aromatawai ā-waho ka whakamahia e NZQA. Koia ko te whakamātautau ā-motu hei te mutunga o te tau, ko te whakamātautau Pāngarau Kaupapa Aromatawai (MCAT), ko ngā kohinga whaiaro rānei mō ētahi kōhi pēnei i te Toi Ataata me te Hangarau.

E rua ngā momo paerewa ka aromatawaingia: ko te paerewa (unit standard) me te paerewa paetae (achievement standard).

Ko te paerewa, he mea aromatawai ā-roto, ā, he aromatawai hoki i tētahi pūkenga. Ko te paerewa paetae he mea aromatawai ā-roto, ā-waho rānei.

Ko tō taumata whiwhinga he tohu anō i tō maia me tō mātua ki te whakatutuki i te paerewa.

E whā ngā taumata whiwhinga:

N

Kāore i whiwhi (KW) arā kāore i tutuki i te paearu o te paerewa

A

Paetae (P) arā i tutuki pai ai te paearu o te paerewa

M

Kaiaka (KK) arā i tutuki kaiaka nei te paearu o te paerewa

E

Kairangi (KR) arā i tutuki kairangi nei te paearu o te paerewa.

Ngā Whakamātautau

Hei te mutunga o te wātaka kura, hei te Whiringa-ā-rangi me te Hakihea, ka tīmata ngā whakamātautau ā-motu NCEA. Mā konei, ka aromatawaingia koe e ai ki ngā paerewa paetae ā-waho e toru pea, nō roto mai i tētahi whakamātautau toru hāora te roa mō ia marau.

Ka pāohotia ngā māka o ngā whakamātautau hei te Kohitātea, ā, ka taea hoki e koe te kite i ō taumata whiwhinga whakamutunga me ō tohu mātauranga kei te paetukutuku matua o NZQA.



Ngā Whakamātautau Matihiko

Kei te whakawhanake nei a NZQA i ngā whakamātautau matihiko, ā, ko te tūmanako ka whakahaerehia ngā whakamātautau katoa ki te pae ipurangi hei te tau 2020.

Kei ngā kura te kōwhiringa ki te whakamahi i ngā Whakamātautau Matihiko Hukihuki (trials) me ngā Whakamātautau Matihiko Tuatahi (pilots) mō tētahi kāhui marau. Mēnā kua whakaetia tō kura ki te whakamahi i ēnei momo whakamātautau, ka whai wheako koe ki te noho whakamātautau matihiko mā te whakaoti i te Whakamātautau Matihiko Hukihuki (arā ka kore e whai pānga ki tō NCEA) mā te whakaoti rānei i te Whakamātautau Matihiko Tuatahi (arā ka whai pānga ki tō NCEA).



Ngā Tohu Taunaki

Kia whakaatu i ngā whiwhinga ikeike, me whai koe i ngā tohu taunaki i roto i āu kōhi NCEA me ō tohu mātauranga. E rua ngā momo tohu taunaki: ko te tohu taunaki ā-kōhi me te tohu taunaki-ā-tiwhikete.

Te Tohu Taunaki Ā-Kōhi

Ko tā te tohu taunaki ā-kōhi, he āhukahuka i ngā whiwhinga ikeike nō roto mai i tētahi kōhi, i ētahi kōhi rānei.

I tō tutuki i ngā whiwhinga 14+ o tētahi kōhi kei te taumata kaiaka (kei te kaiaka me te kairangi rānei) **i te tau kotahi**, ka riro i a koe te tohu taunaki ā-kōhi Kaiaka. Hei taurira, ki te whai 14 whiwhinga kei te taumata kaiaka mō te kōhi Kuki Airani Māori, ka riro i a koe te tohu taunaki ā-kōhi Kaiaka mō te Kuki Airani Māori.

I tō tutuki i ngā whiwhinga 14 o tētahi kōhi kei te taumata kairangi i te tau kotahi, ka riro i a koe te tohu taunaki ā-kōhi Kairangi.

Kia whai anō i te tohu taunaki, me riro i a koe ngā whiwhinga e toru mai i te mahi aromatawai ā-roto me te toru whiwhinga anō mai i te mahi aromatawai ā-waho. Hāunga ko ngā marau nei, ko te Mātauranga Hākinakina, ko te Mātauranga Hāhi, ko te Toi Ataata Taumata 3 hoki.

Ehara i te mea he tohu taunaki ā-kōhi kei ia o ngā marau, ā, kei tō kura anō te tikanga o āna kōhi. Mā rātou anō hoki e whakatau ko ēhea o ngā momo paerewa e tika ana mō ngā kōhi.

Te Tohu Taunaki Ā-Tiwhikete

Ko tā te tohu taunaki ā-tiwhikete he āhukahuka anō i te whakawhiwhinga kairangi o te tohu mātauranga.

I tō tutuki i ngā whiwhinga 50+ kei te taumata Kairangi, kei te taumata hoki o te tiwhikete, ka riro i a koe tō tohu NCEA taunaki ā-tiwhikete Kairangi.

Mēnā ka riro i a koe ngā whiwhinga 50+ kei te taumata kaiaka, kei te taumata anō hoki o te tiwhikete, ā, ka riro rānei i a koe ngā whiwhinga 50+ kei te taumata kaiaka me te kairangi, ka tutuki i a koe tō tohu NCEA taunaki ā-tiwhikete Kaiaka.

Ka taea te whai haere i ngā whiwhinga mō ngā tohu taunaki ā-tiwhikete NCEA (Kaupae 1, 2 me te 3) nō roto mai i ngā tau maha.

Te whakauru Whare Wānanga (UE)

Ko te whakauru Whare Wānanga te tohu matua kia ako ki tētahi whare wānanga ki Aotearoa nei. Kia whai i tō tohu, me mātua tutuki i ngā mahi e whai ake nei:

- NCEA Kaupae 3
- 14 whiwhinga o ngā marau kua whakaaetia kei te Kaupae 3. Tirohia te paetukutuku o NZQA mō te rārangi marau kua whakaaetia.
- Ko te reo matatini UE – 10 whiwhinga kei te Kaupae 2, 3 rānei mō te:
 - Pānui (e 5 whiwhinga)
 - Tuhituhi (e 5 whiwhinga).
- Ko ngā tohu tau UE – 10 whiwhinga kei te Kaupae 1, piki atu rānei (he rite anō ki ngā herenga mō ngā tohu tau NCEA).

Tirohia te paetukutuku o NZQA mō te rārangi paerewa kia tutuki pai ai ēnei herenga.

Kei ngā whare wānanga anō ā rātou ake herenga mō te whakauru i ngā hōtaka ako. Me whakapā atu koe ki ngā whare wānanga pai ki a koe mō ā rātou kōrero whakamārama me ā rātou kaupapa here.

Ko te New Zealand Curriculum me te Marautanga Māori o Aotearoa ka whai pānga ki te NCEA me te UE.

Ka tukuna ngā tohu Whakauru Whare Wānanga hei te marama o Kohitātea.



Te Hiranga – Ngā Karahipi o Aotearoa

Ko tā Te Hiranga, he āhukahuka i te kairangitanga me te tākoha moni. He mea pātaritari anō hoki mō ngā ākonga e mātau ana ki ā rātou marau. Ki te uru atu koe ki ngā mahi a Te Hiranga, ka aromatawaingia koe ki tētahi paerewa mā te noho ki te whakamātautau ā-tuhi, ā-waha rānei, ā, mā te tuku hoki i tētahi kohinga mahi whaiaro, i tētahi pūrongo mahi rānei kua whakaotia i roto i te tau. Ki te hiahia koe ki te uru atu ki ngā mahi a Te Hiranga, me kōrero ki ō kaiako i te kura.

Ngā Huarahi Mahi

He anga a Ngā Huarahi Mahi e āhei ai koe ki te whakamahere i āu akoranga me āu mahi rangahau, ka mutu, he tautāwhi ki te whai hōtaka ako ki te mahi rānei. E ono ōna rāngai:

- Te Waihanga Rawa me te Hangarau
- Te Hanganga me te Hanga Whare
- Ngā Ratonga Ahu Matua
- Ngā Ratonga ā-Hapori, ā-Pāpori
- Ngā Ratonga Whakauwhi Tāngata
- Ngā Ratonga Auaha.

Ko tā te tohu Ngā Huarahi Mahi, he whakanui i tō whakaoti mahi e ai ki tētahi o ngā huarahi. He whakatairanga hoki i ngā akoranga me ngā pūkenga e hiahiatia ana e ngā kaiwhakawhiwhi mahi. Ka taea hoki e koe te whai tohu mō ngā huarahi katoa ka whaia nei e koe.

Te Tirohanga whānui

Ki te whai i Ngā Huarahi Mahi, me mau i a koe te:




Reo matatini NCEA



Ngā tohu tau NCEA



Kaupae 2 NCEA



Ngā Rauemi Tautoko

Te Mana Tohu Mātauranga O Aotearoa

www.nzqa.govt.nz
0800 697 296

Ngā kōrero whakamārama mō te NCEA:

- ngā marau
- ngā rauemi marau
- ngā wātaka whakamātautau.

Te Tāhuhu O Te Mātauranga

www.education.govt.nz

Ngā kōrero whakamārama mō te mātauranga i Aotearoa nei me te Marautanga o Aotearoa.

He Kī Taurangi ā-Rangatahi

www.youthguarantee.net.nz

He whakamārama e ai ki ngā huarahi ohu mahi.

Mana Rapuara Aotearoa

www.careers.govt.nz
0800 222 733

- Te tūhura tūranga mahi 400+
- Te rangahau umanga me te tuhi i tētahi tātai orange
- Te tiro ki ngā hōtaka ako me ngā hōtaka whakangungu
- Te kōrero tahi ki tētahi mātanga umanga

Te taupānga NCEA Guide

He taupānga kore utu tēnei, ā, ka tikina i iTunes me te toa Google Play.

He taupānga mō ngā mātua, mō te whānau, mō ngā kaiwhakawhiwhi mahi hoki. He whakamārama i ngā tūāhuatanga katoa o te NCEA.

Whakapā mai

Waea: 0800 697 296

Paetukutuku matua: www.nzqa.govt.nz

Īmēra: helpdesk@nzqa.govt.nz



@NZQAofficial



@NZQAofficial